



聖宋名賢五百家播芳大全文粹卷五十九

賀啟

賀陳制置啟

李汝為

伏審密奉隆恩顯膺異數擁諸道兵權之重任一時  
帝命之專久鎮侯藩增光帥幕凡居節制爭功欣愉  
恭惟 某官濟世才高立朝人傑文章出於餘事術  
業本於壯圖尚郤縠之詩書兼吉甫之文武忠誠夙  
著金百煉以難回正直獨行玉三獻而始辨感遇風

雲之際會縱橫龍虎之韜鈴藹民望於縉紳結主知  
於黼扆邦畿之右伊維而南雉堞相高卧護列城之  
寄舟車所會折衝千里之遙從十萬之王師宣九重  
之廟畧宵中敵國天下長城總戎遠逮於重湖禦武  
仁寧於全楚冀遂之息盜賊俾嚮化以自安寇恟之  
撫吏民乃迎風而咸定舉賢能於不次錫綸綍於非  
常許以便宜展盡經綸之術久於委任倚成扞蔽之  
功鳴騶在塗抗旌入境郡邑想聞其風采官僚仰望

其威名某濫預分符側鈴視印未識荊州之面已託  
庇於幘幪仰瞻元禮之門但馳誠於履舄

賀韓制置啟

譚拂雲

伏審諮詢才實敷錫寵光躋五品之階總兩使之重  
任並為異數交慰師言恭惟 某官磊落絕倫踈明  
適變迎刃而解謂世無難成之功名無心於求蓋已  
有必至之富貴班超何妨投筆充國復見罷屯旋被  
殊恩亟聯華貫乃眷朔方之重地是為天下之奧區

須有實倉廩於暇時乃可制戎狄之死命方今鈔幣之法悉復故常衣食之源寢趣豐裕肇分使寄屬在周才固已昭百勝之威何止盛九年之蓄輿論所嚮成功可期某少慕激昂晚甘窮困不知抱關之甚陋猶復攘臂而自於己及瓜而當歸尚守株而弗去雖諧庇覆之願足慰滯留之私載企光塵倍深欣懼

賀張制置啟

邵公濟

遠分重地肇建行臺名震華夷慶闕宗社恭惟 某

官道德異稟文武兼資方為庠序之通已負廟堂之望高文大冊極爾雅於諸儒正論謹言嗣遺直於先世密參大政坐致中興獨膺推轂之求適契請纓之志願成功之甚偉尚秘計之不聞熊羆之士未鼓以行蛭螾之寇已俯而拾通秦蜀而不隔極荆楚以無虞副聖主之傾心為名臣之稱首就護諸將易制全師增地形表裏之雄擬陣法首尾之勢豈徒居焉以保遠服蓋將自此而出中原強虜心驚武士氣倍某

已陵老境方宅大憂痛今古隔於九原念契義高乎  
三世當記喬公之約尚憐嵇氏之孤頓失沉疴覩天  
日而增快自慚薄技望節鉞以知歸

賀方察訪啟

黃獻之

伏審日侍清光密資獻納親承認旨來總諮詢將獲  
整於前旌俄擢司於中省惟六尚最親之職實三朝  
未命之官明敷典領之才益責光華之選恭惟某  
官用兼數器譽振一時博辯之資言皆析理精神所

照無遁情仰當睿聖非常之知亟被便藩不次之寵  
乃眷陝服當五路之浩繁暫假周才分八使而督治  
威名遠暨倏觀澄察之膚公恩渥薦加盡繼休明之  
聖世某久塵委使未著涓埃將瞻望於餘塵冀仰承  
於大庇炎蒸在候榮衛方勤祈倍保於生經用益隆  
於天眷永言欣頌莫罄敷陳

賀鄭察訪啟

張真父

伏審密奉疇咨顯膺臨遣極當世光華之重副本朝

宵旰之勤聳然高風動于羣聽恭惟 某官才優而  
識敏言辯而智深出值亨嘉名既高而實自稱進當  
繁劇必不頓而力有餘乃眷三秦仍分六道內連甸  
服外控遺羗官吏兼文武之宜疆場有兵食之備故  
此澄清之任尤資通變之才昔者屬城已戴二天之  
譽于今羣目具瞻八使之崇即茂休功遂還世職某  
自憐弱植徒愧空殮念夙借於餘光獲將承於大庇  
炎蒸未已徒御方榮惟倍保於寢興用益隆於眷倚

但勤欣頌曷旣悃悰

賀姚觀察啟

邵公濟

遠持將鉞出護塞垣喜動軍中聲聞境外伏惟慶慰  
伏以 某官家傳忠義世有勲勞威名素震於關西  
風采已傾於朝右衛青拜命衆皆聽於大將軍李愬  
立功人但呼為小太尉方時謀帥為國扞城喜寇恟  
之復來里閭動色聞臨淮之初至旗鼓生風肅承開  
府之新亟辱移書之寵某間焉何濶老矣無竒恩重

命輕欲退藏而未敢眷深分厚宜教督以居多踴躍  
之私梗槩干是

賀曾總領啟

光奉新恩榮還舊物掌萬民之版籍首被疇咨幹六  
路之貨財茂膺臨遣攬轡載馳於故治列城夙稔於  
先聲郵報一傳輿情共慶恭惟 某官朝推令德世  
有美名學守韋平端是相門之相句凌鮑謝謂真詩  
人之詩天資自得於高名人品有餘於醞藉含香覆

錦妙齡早試於為郎叱馭登車要路幾經於出使所  
治皆最無施不且橫翔未及於中年僉論已嗟於大  
晚眷茲元帥控彼上流聚金穀者不過六十州屯貔  
貅者無慮百萬計自非轉輸之有術孰能供億之不  
窮遴選老成揔持要領揆之時望捨公其誰欽惟導  
騎之鼎來增重軺軒之偉觀木牛流馬想飛挽之靡  
勞鷲獸鳴鳶率奮揚而自厲某少知學問長困羈窮  
素無取堂下之言豈足參幕中之畫行將託於大厦

真有獲於初心，莫蒙一眄之榮，以塞平生之願。歲律  
晚晚，江國沍寒，跋履之間，保頤是禱。

賀王總領啟

林豈塵

祇奉宸音，總司國計，郎位叶東宮之應，使星符西益  
之占，驛書競傳，士論稱美，恭惟某官，氣岸高雅，宇  
量粹融，平生以富貴自期，吏事以經術為飾，漢閨通  
籍，名已重於縉紳，諸公之間，楚嶠觀風，人自得於湖  
山千里之外，方上計臺之最，俄分版使之權，率六路

之武而歸乎有司，會九年之儲而按其大數，厥今所  
尤重者，於公蓋優為之，聚金穀幾一百州，咄嗟可以  
必辦，屯糶糶數十萬眾，餽餉為之有餘，倚觀報政之  
成，即徯回朝之疾，某近有除目，喜得吾賢，川途相遼，  
不能隨賀客之後，紙筆為問，姑少叙故人之情。

賀汪總領啟

李方叔

顯膺綸制，峻陟揔臺，逖惟攬轡之澄清，孰不望風而  
震疊，屬居封部，倍激懽悰，伏惟歡慶，恭以總領少



卿中正以通柔嘉維則學術諸儒之冠吏能百執之  
師久簡在於宸衷屢屈將於使指聲猷籍甚課績藹  
然宜當不次之求爰即非常之拜統雖六路刺舉百  
城卿月已高光輝臨於楚甸辰樞將拱步武接於堯  
庭某倅貳濫居疲駑何補祇念簡書之威敢辭闕決  
之勞願晞仲舉之風題輿以俟竊小巨卿之操投傳  
而歸

賀曾總管啟

周子充

伏以貳元帥之事寔綰要權殿天子之邦遯惟巨范  
方欲通於柔翰乃先枉於華緘恭惟 總管知閣太  
尉寬裕有容疏明無滯緣飾素高於儒雅波瀾坐進  
於老成龍已飛天獨眷潛藩之舊鵬方擊海共期要  
路之登束帶立朝則典二閣之容儀擁麾為將則亞  
十連之節制伋膺驛台還侍禁遊某涉道最近趨時  
甚拙諫垣有玷嘗慕於責難冊府無裨遂甘於置散  
豈圖記錄復冒召除薦更南紀之封仍寓西清之直

雖由塊土亦自吹噓念報惠之於瓊瑤而負愧深於  
芒刺矧加辭訥曷盡意誠

賀曹總管啟代

熊子復

伏以典宸闈之近職久切嚮風貳帥聞之中權方諧  
借潤審旌麾之壓境寓絨牘以控誠伏惟 總管知  
閤仙韻邃清神標凝重識達古今之變才兼文武之  
全會早際於風雲恩久承於雨露贊縟儀於二閣任  
峻橫班侍清燕於九重寵均法從蔽自穆清之眷蔚

為希濶之榮總戎乘以啟行御便朝而臨遣閔封偃  
息聊增重於十連漢札疇庸仁陞華於六彙某猥叨  
使傳獲並將旄屬茂對於融和願精加於頤嗇

賀廖總管啟

王宣子

峻陞橫列榮佐揔戎見寵數之有加舉輿情而共慶  
伏惟 某官良謀經遠精誠照微踴躍一行綽著提  
師之効周旋四守茂凝拊俗之功果被眷知併承華  
渥更聽明言之召顯躋侍衛之崇成命可期指日以

俟某久同寓止猥荷照憐贊喜修誠悵裁牋之未果  
搗謙制禮辱貽翰之輒光

賀傅總管啟

李仲信

光貳元戎復臨故部聖人之武不殺方戢於干戈天  
子之錫有功遂顯於弓矢先聲所屆公議已孚伏惟  
某官妙畧鷲况英材饒逸智達鬼神之變克壯其  
猷威加草木之微不顯亦世惟踐揚之甚久故眷遇  
之不衰乃出副於元侯以同護於諸將某聞風自昔

問俗于茲念馳書之未遑忽寵緘之先逮虎頭願後  
尚阻覲於英姿豹尾導前位更聆於異數

賀王戶侍出使啟

熊子復

伏審輟陪樞幕還貳板曹鼇禁代言兼奉內朝之顧  
問龍庭將命更宣大國之威靈流傳邇遐聳動觀聽  
昔我神文享國之甚久若田宣簡理財之最長以至  
歐陽子之任辭臣文忠公之使敵國是皆曠絕孰與  
等倫有來當代之英兼擅羣公之美恭惟 判部直

院侍郎受才傑異造理精微胷次容萬頃之波毫端  
扛百斛之鼎既蜀道之久任盍歸乎來雖漢庭之多  
才無出其右預禁塗之諷議參督府之謀謨雖晉公  
欲屈於昌黎而文帝思訪於宣室趣歸計省無財穀  
之問至廟堂進直詞林有書札之文賜方國屬羌胡  
之來款煩徒御以出疆雖古膚使劣諸豈特能於專  
對告嗣天子王矣俾復獻於歡盟仁觀英蕩之歸亟  
贊巖廊之重某猥行原隰逖望門墻莫陪賓客之趨

曷勝寤寐之喜

賀奉使啟

郭中行

被命嚴宸宣威外域實為重事宜屬偉人恭惟 某  
官器量宏深辭華敏妙謀猷入告每有犯而不欺文  
武兼資顧無施而不可適重使奉之選堪為喻蜀之  
行蓋夙簡於上心宜肅將於王命實本朝之故事極  
當世之榮觀某猥以凡庸誤膺器使仰聞盛譽竦聽  
除音妙術占星欲訪幽人之學深誠向日喜聞信使

之臨

賀王茶馬啟

劉季高

伏審榮升計府申蒞茗司千里傳聞一詞懌豫百吏  
共推於大手兩川將至於息肩必著宏規永驅宿弊  
恭惟某官識據異稟行輩前脩出乎忠孝之故家  
辨若功名之餘事一言一樂無羣士篆刻之風百舉  
百能守先朝篤老之論惟獨蘊於天而絕異故所臨  
之地而有聲大盜驚心坐安北服小民引領卧治南

充辟止辟而刑祥心格心而吏畏果躋峻職益簡上  
心茗旗將擷於羣秀之中有遺味矣驥窟行空於萬  
里之外無留良焉佗為異最之升重見脩門之入某  
受才實散荷顧特深久漸東閣之遊退遂北堂之養  
既一生不得文字之力故百里不免簿書之勞身留  
空山日對小吏睇窮塗而甚感望舊館以祈恩魂夢  
交馳典刑未遂驟聞好語豈敢賦十離之詩已振弊  
冠固將卜三沐之見其為欣悅莫究賀悰

賀周茶馬啟

周少蘊

六轡交馳遠播皇華之譽連城聳肅共傾按察之威  
里俗駭觀士林欣慕竊以陝蜀萬里茶馬兩司飲人  
資槓茗之功行地用駒駘之力霜華期火已知利孔  
之開駿骨生郊偏覺國威之重千綱載路四種殊毛  
土宜分權課之征地類有阜蕃之政立為彛憲委以  
行臺必資經濟之才共講富強之計恭惟某官岳  
神儲秀星昴降精學窮古今之傳識洞天人奧少

游辟水富有文章晚入仕塗諳該政術肅將臣節簡  
在上心初分宰字之封旋入編修之局幕賓開府都  
人誇淑問之陶竹馬迎郊邊郡重借留之寇宸衷軫  
念朝望邁歸解還銅虎之符召對金鑾之殿未溫魯  
席已擁漢軺究詳土物之征監視邊防之用求之有  
藝壓趙贄之始謀思則無疆過魯僖之善牧山澤之  
利盡歸於公府田戎之備不匿於私家稅從什一之  
輕虜有空資之困錢流地上疏開貨利之源籌運幄

中默破羗戎之膽非獨盡利國強兵之術又能申折  
衝卻敵之謀邊帥奏功壘書進秩玉堂金馬肇分袂  
奧之司東觀蘭臺漸闢校讐之地掌開元之四部真  
東壁之二星將參侍從之聯暫厯圖書之府前有柄  
用此為要津當三冬雨雪之塗攬一道澄清之轡輜  
車夙駕故社驩迎衣錦還鄉笑指江山之舊過家上  
冢光生阡陌之塵凡屬庇庥庥率增抃蹈某曩緣世契  
獲覩下風久懷賀厦之心喜有拜塵之便

賀陳茶馬啟

沈元用

伏審輟自省曹分將使指利盡摘山之計弼成富國  
之功總天廡之雲屯助王師之電擊三朝選使常冠  
於他司萬里提封悉歸於餘照側聞喜命彌仰休聲  
恭以 某官沉靜而有為高明而多恕學洞九流之  
奧不取近功文雕萬寶之華尚為餘事惟好修而難  
合故屢抑而愈剛相如歸客於臨印何妨奏賦劉向  
出護於都水未害著書初不聞名利之談况復有喜

愠之色蘭臺與節虎節觀風姑為大任之權輿終見  
古人之事業其蚤諧棲倚亟荷眷憐錄其荒唐之辭  
謂之可教矜此固陋之質許以無他今玷師儒適居  
刺部想光華之在望悵趨走之未遑抃幸既深瞻依  
載極

賀王提泉啟

周子充

伏審入條婉畫上契清衷帝寵方新光寓圖書之直  
使名加大全提寶貨之封有識相趨不謀同慶恭惟

都大提點顯謨英咨挺出逸韻雄成摘華有寒芒  
正色之垂游亦見錯節盤根之解蚤登陪於九列旋  
出領於三官園府歲輸金布充於都內釐室夜對智  
略湊於上前果陞六閣之聯獨總九路之貨蓋元豐  
始隸於兩使而景祐實總於一臺職遠而高既示褒  
賢之渥任專以重更彰復古之模卓為從橐之階即  
有追風之趣某猥當共理逖借餘休惟頌歎之方勤  
顧揆裁之曷旣



賀劉提泉啟

鄭明舉

比奉詔條來司園法揆時載協布政聞初條教所孚  
吏民交賀伏惟 某官器能甚博學行兼優材久試  
於吏途望素優於朝論三江奧壤簡聖意以方深九  
府利源藉能名而有賴少需成績行擢要津某早望  
煒符幸依庇類阜財解愠將有望於絃歌入境宣風  
行遂披於雲霧茲為慰愜實倍等倫

賀沈提泉啟

侯彥周

綸命初頒罄朝端而歸重宏才素辨覺邦計之如流  
幸叨部吏之聯敢拜記曹之牘恭惟 某官清規映  
俗厚德傳家學通萬卷之餘命偶千齡之會星郎入  
侍選含香簪筆之華郡紱薦紆留截銜攀轅之愛繡  
衣仍舊畫錦增榮出持陶冶之權益遂澄清之志盡  
東南之奧壤歸宰制之洪鈞名山大川不秘所藏之  
寶羣司庶府頓銷嗜利之姦知源流本末之因有輔  
贊彌縫之理某濫蒙教育未脫羈窮坐常困於針氈

居每傷於塵甑引吭數口侍次十年往方趨於瓜期  
哦復親於松蔭偷安海邑獲仰星軺顏子之事仲尼  
雖貧亦樂鮑叔之知管仲有過何虞唯恃恩私乃成  
煩瀆過此以往未知所裁

賀王提泉啟

崔德符

伏審光奉宸恩榮持使節剛辰已協輿頌交歸恭惟  
某官東箭南金泰山北斗繡衣畫斧常將命於四  
四方隼旆牙籌遂流錢於九路號令一新於萬里威

權更重於三司竝聞財用之豐餘益厚冕旒之顧盼  
別膺茂渥入佐中興某夙荷旃幃今居總屬再覲光  
華之遣喜色增新但深欣躍之懷願言罔既

賀晁提泉啟

王宣子

伏審特奉綸恩就兼泉政入丞九列比承帝遣之榮  
出使四方增畀皇華之重搢紳動色原隰增光竊以  
周室制嚴掌具存於九府漢家禁密鑄獨在於三官  
逮我聖朝參諸治古景祐始顯於一使元豐分設於

兩司然創事必貴因時而得人乃可行法眷此山川  
之寶實惟財賦之淵官聯豈限於常負使務式煩於  
并總恭惟 奉使提點寺丞英豪間氣醞籍名流早  
厯要塗光膺妙簡佐大農之職綽著於顯庸領數路  
之權益隆於雅望某猥栖郡幕逖望使臺阻修敬於  
門墻輒控誠於竿牘列朝班而將使指式觀富國之  
經持從橐而贊皇猷嗣獻得賢之頌

賀提舶啟

林豈塵

榮膺紫渥寵耀皇華屬中都疏用度之源俾外府幹  
貿遷之利慶傳賓驛喜自郵音恭惟 某官山川炳  
靈日月垂譽蘊淵乎似道之質得浩然養氣之方檄  
筆幕謀舊泛儉蓮之綠水寢香門戟坐臨韓木之清  
風載褒治行之優遂被光華之遣矧嶺表去中州而  
遠惟司舶有南庫之名金貝綺扇咸萃於中珠玉象  
犀不勝其數馬節使嘗兼其使迺新作饗軍之堂孔  
祭酒欲示其情遂首罷鬪貨之燕在今日尤重此選

屈我公特為是行牛酒以厭者將滿於塗梯航而至者欲藏於市衆心所頌拭目惟新某頓來海瀕獲謁麾下辱待以過客之禮幸望夫君子之儀茲何際會之多又備奔走之役姓名若問誰為顛顛之言紙墨有情敢致起居之意

賀提舶啟

孫正之

伏審䟽渥紫宸聯華翠節接月卿之鳴珮夙展高蹤按海國之飛檣肇分直指旌輶鼎至原隰頓光仰止

先朝之洪摹取諸外域之瑰產年紀載登於元祐使華增建於溫陵遠致番商萬里泛鯨波之舶入輸京藏百物萃雞林之珍孰縮要權必疇雅望恭惟提舉寺丞家傳奧學世載令名賦質厚於渾金制行清於潔玉入陪九列垂踐要塗出布六條暫乘偏障果錫十行之札就移六轡之馳嗣降追鋒徑登從橐某猥分十甸逖望星臺蠻夷八九之通姑重收於歲息聖賢千一之遇佗越進於宸猷

賀張都運啟

楊萬里

伏審妙簡清衷肅將隆指寵陞論撰亞僊禁之高華  
任督將輸統神臯之浩穰有識交頌不謀同辭永惟  
聖哲之經營先自國家之根本疆連吳越昔嘗起於  
霸圖運際唐虞今遂成於帝甸天驕將歛於渭上人  
傑宜漕於關中伏惟 運使殿撰少卿奧學研幾周  
才濟劇巨室一國所慕亟濟獻納之聯皇華六轡載  
馳屢畀按澄之職然負全才者要須綿歷而將大任

者豈厭回翔尚屈壯圖式觀殊最長安三輔暫煩蕩  
節之臨文昌六聯即被贊書之寵是惟公望夫豈私  
期某猥殿于蕃寔當所部審初交於軺傳庸遠寓於  
緘滕聲雖成文言莫盡意

賀傅都運啟

伏審薦膺綸制改副使權惟七寺之近班已推茂實  
故三秦之劇部復賴周才成命既傳輿情胥慶恭以  
某官材猷英博識量宏通蚤預賓筵謀深惟幄俄

趨召節名動搢紳蓋惟磊落之資宜在光華之選復  
陪郎省屢典藩符愛有甚於棠陰榮每憐於棣萼周  
廬千列方觀不識之才積粟九年更茂夷吾之略某  
行能甚下門戶已衰不自知其疲駑猶未忘於奮發  
獲塵周序猶聞樂職之詩幸與邦人共仰登車之志  
使旌在望驩頌載深

賀謝運使啟

沈德和

伏審入覲天光親敷使指載嘉偉績申錫殊恩內躋

禁閣之崇外正漕權之重寵紆金佩榮集使華伏惟  
驩慶 某官智術深明才猷博達學洞古今之要文  
摛道德之英揮塵名言聳高風於微子臨池妙墨抗  
逸駕於元常蓋自峻陟要津備膺宸眷顧茲朔部控  
彼燕垂謂制勝當戒於不虞而威敵莫先於自治昔  
文帝收實塞之議後世因資以破胡惟壽昌沮糴穀  
之謀諸羗卒聞於畔漢文德繼武聖謨通天申命寶  
臣築倉會府風飛雷動而有作天造地設而告成因

民欲之所同故子來而弗擾亟底成績深契上心敷  
錫寵榮聳動觀聽何止富九年之蓄固已收百勝之  
威別奉疇咨入膺大用某稟質極陋託庇至榮以甚  
踈無用之才當難辦不習之職固思黽勉終懼譴訶  
仰大匠之兼收庶散材之不棄私積蔭雲之幸恭陳  
賀厦之誠載跋帡幪詎殫悃悞

賀芮都運啟

孫正之

伏審顯膺紫渥寵耀皇華旂幢將下於南荒肴驛爭

陳於前次威聲遠被風采聳聞竊以厥今五嶺之陬  
在昔百粵之地自有唐以來氣俗已變逮本朝之興  
聲教旁加於監司郡守欲重其權非明公鉅卿莫副  
茲選矧計臺尤急於用度在中郎實藉其轉輸聚歲  
貢五十萬緡此其大數餉官軍幾千百計為之有餘  
且南宮悉自於銓衡故當宸每難於委注惟帝時舉  
則公其人恭惟 都運御史先生學自心傳道存目  
擊淵源得之游夏卓犖傾乎鄒枚此一旦事業之施

為皆前日詩書之張本謂堂上之讀而見笑詎肯言  
糟粕之餘雖臺中之詳以為傾竟無負鷹鷂之擊方  
明天子匪輕其外任茲部刺史喜得於吾賢第恐輜  
軒未下欲下方下之間遂有走節一命再命三命之  
召某雅非一日獨有二天硯席同遊猶記杏壇之風  
月弩矢為役當驅海嶺之埃塵苟富貴未必相忘則  
貧賤有所不棄寸心所慕尺牘難言

賀沈都運啟

伏審榮持英蕩遠耀皇華颺命九重方黼宸暫辭於  
日月班風八郡迺繡衣舊領之山川先聲一傳佳頌  
四起恭惟 某官剛大養而以直敬義立而不孤富  
貴固所自期文章迺其餘事諸公無出其右已先臺  
省之登天子尤器其材將為廊廟之用金馬政煩於  
遞宿承明何事於擇歡盖上方不以外而分重輕  
故公亦無以出入而有難易寵被周家之禮樂薦揚  
漢使之威儀攬轡遂行慨然有澄清天下之志給餉



不絕庶幾成轉漕關中之功第恐輜軒未下之間而有走節再命之名某言非私佞賀與衆同有司而主權衡頃已在門生之列先驅而負弩矢當益修縣令之恭

賀陳都運啟

孫仲益

一札流聞大慰雲霓之望十城驚聳竝瞻斧繡之光恭惟某官夙擅冀北千里之稱時推斗南一人之傑培風背於九霄之路析秋毫於百戰之場攬轡車

中鷹隼殆將擊矣埋輪道上狐狸何足算焉某老病守藩踈庸負國謾索太倉之粟無補縣官空餘涸轍之魚以俟君子俯深欣頌莫究名言

賀王都運啟

孫德莊

伏審密預選掄進當臨遣服寵名於秘殿揔漕計於朔方霽然休聲震於羣聽恭惟某官踈明而有守宏裕而好謀才周文武之全識照幾微之本經術深博極游夏之淵源文章英竒軼班揚之氣象自致功

名之會獨膺睿聖之知陸賈南馳百粵請命唐蒙西  
使夜郎入朝勲績亟掩於前人風采聳聞於當世載  
錫便蕃之寵用昭俊偉之功帝眷北方朝詔名德輟  
中臺之要劇付一道之事權資通微應變之才致經  
國裕民之要詎止富九年之蓄固已收百勝之威自  
茲朞月之間必踐公台之任故事未邈斯言不謏某  
猥以疎愚厚承矜獎明廷賜第嘗並英遊病木辭春  
獨為棄物蒙曲記其曩昔頗不忍其固窮幸以姓名

列在臨按使獲在驅馳之地未必無尺寸之功惟深  
恃於哀矜輒自忘其進越光華在望傾重載勤

賀胡都運啟

洪元之

伏審益隆宸簡升正漕權使指增雄仍揔神臯之部  
官儀愈峻例階僊禁之除帝得真賢士有公論竊以  
用才者莫良於已試有功者必喜於見知按長安三  
輔之繁既彰殊最頒建武十行之渥姑進顯名恭惟  
都運敷文奧學研幾周才濟劇蚤聯內閣盍躋法

從之華徧歷近畿綽著吏師之績果就陞於使號位  
擢貳於尹條某猥處冷曹獲登崇仞一言褒重已欣  
孤跡之逢九里澤多更為士流之慶

聖宋名賢五百家播芳大全文粹卷五十九終

聖宋名賢五百家播芳大全文粹卷六十

賀啟

賀章都運啟

鄭元嘉

伏審錫命宸庭陞華使指借經綸之妙手重飛輓之  
名司溫旨初班列城相慶竊以兵農以判食貨甚難  
方一隅彫弊之餘尚百年誅求之急損下益上豈聖  
賢愛物之心草故鼎新此君相用人之意况銓曹之  
冗劇受多士之奔趨按資格以擬吏員猶是有司之

故事退小人而進君子實行宰相之重權眷言簪組  
之林均負雲霄之望終言巨德簡在上心其曠度海  
涵清標山立處功名而素定視富貴而若無歷觀向  
者之施為皆在坎然之士苴朝廷考課非徒降璽書  
而褒次公郡縣望風將欲解印綬而避元禮某蒙思  
最厚投袂而興條教清明又將耳聞而目見家鄉咫尺  
可云朝往而暮歸

賀胡都運啟

張守全

光被恩綸出司漕計所賢所至民吏相驩伏惟 某  
官器識宏深風猷高遠益隆時望夙秉聖知持節外  
臺屢更煩使握蘭華省寢躡要資惟東州之奧區為  
諸道之劇部非通材不足濟國用非遠略不足究利  
源時惟僉言允屬賢業九年足用坐追滋殖之風四  
輔維人行被吁謨之眷某幸緣聯事遂獲依仁尚阻  
參承但勤嚮仰

賀劉都運啟

孫仲益

伏審光奉帝綸肅將使指諫大夫伏蒲殿上方疏三  
接之榮部刺史埋輪道中又兼十連之聳恭惟 某  
官才高難用道大不容撞千石之鐘而噎於寸蓬駕  
萬斛之舟而膠於尺水姑矢謨於問陳旋賦命於乘  
軺龍馬負圖聯內閣邃嚴之直木牛輓粟皆太倉紅  
腐之餘方賜覲於中宸行亟濟於邇列益隆雅望允  
副師言某偶叨奉於藩條竝仰瞻於金節尺書起廢  
固已賢十部之臨衰晚臥疴乃獨有二天之庇

賀董都運啟

史唐英

顯膺異數峻陟近班進總漕權再臨舊部伏惟歡慶  
竊以接袂飄纓徊翔華閣乘軺仗節按刺屬城願微  
名實之在人合副冕旒之注意恭惟 某官材周事  
變識洞幾先出入宣勤業蘊著聞於天下清閒賜對  
謀猷適契於上心豈惟邦族之英實為海內之俊千  
箱轉粟仁告於成功一節趨朝即還於近著某貌是  
孤平之跡政依陶冶之仁踴躍忻愉倍萬倫等

賀任都運啟

陳君舉

伏審勇退朝聯榮歸卿部奉常出使外臺增禮樂之  
華寓直尊賢內閣預圖書之秘雖小稽於從索亦深  
艷於儒紳恭惟 都運少卿寶文道廣大而精微文  
雄深而雅健入峻躋於三院出屢按於十連趣以鋒  
車覲于黼宸太平之定制作既預彌文老成之重典  
刑宜躋邇列烜赫處功名之地雍容見明哲之風上  
重違於懇誠外委顯於漕計閩封惟舊暫煩玉節之

行漢札方來即聽金鑿之召某猥叨撫字獲奉按澄  
迎大使之軍念方祈於巨庇贄小夫之牘敢預控於  
危衷

賀胡都運啟

胡仁仲

光奉綸言榮躋計府傳聞千里歡豫一辭切以任官  
之難莫如將漕之重必資巨德庶草弊原劍嶺千畦  
極遠近賦輸之困龜城一道當東南早暎之衝非仁  
人起而救之其大勢可以憂矣忽聞休命想遂遠圖

恭惟 某官學輩前修識通異貫名盛而實甚副論  
高而用不踈詞令最閑言語妙乎天下起注得體風  
采聳於羣臣驟輟邇聯肅臨遠服重湖政舉特披夢  
澤之雲九頂化成再問峩眉之月惟留滯寒鄉之久  
宜從容溫詔之頒爰陟使華行驅民瘼某聞道有自  
受知獨深見見君子竒字可識獲稱德秀世利多忘  
偶緣寒餓之驅遂致典刑之遠窮途易感撫弊索以  
川流勝踐何時候歸艤於日下

賀陳都運啟

王周士

伏審光膺宸命榮領使臺凡在幘幪舉皆抃蹈恭惟  
都運寺丞才優王佐望重時髦蚤登俊造之科夙  
簡聖神之眷進聯鷺序典百官廩稍之司出擁繡衣  
總一路轉輸之任豈但飛芻而輓粟蓋將激濁以揚  
清九重注意以尤深八郡望風而皆悚流錢地上方  
資富國以強兵持橐朝中行賴庇民而尊主某奔馳  
下吏流落孤蹤居官茂補於一毫守法第循於三尺

幸負丞於百里將託茫於二天親除日之誕頒激愚  
衷而倍喜簡書是畏崇階莫快於鳧趨竿牘用修大  
厦輒伸於燕賀其為欣慶罔罄敷陳

賀劉都運啟

王德立

伏審日覲天光親敬使指薦敷寵數益正漕權成命  
流聞輿情慰悅恭惟 某官才周事會識在幾先自  
任以當世之功名獨高乎古人之氣節是以忘者雖  
衆而効愈白毀之不沮而志益剛名既簡於上心言

盡當於帝意稽於衆論且光贊於本朝眷此一方俾  
緒成於前績少留歲月還侍冕旒某猥以庸虛蚤塵  
知獎身居部屬已厚蜀于庇庥職在學宮仍親承於  
規畫豈有藿蠟之能化自知商詎之弗勝終恃吹噓  
庶收尺寸光華在望瞻頌彌深

賀趙都運啟

宋嗣宗

伏審祇奉寶書榮將繡指中都啟監久參戎器之除  
外部建臺特被使華之遣縉紳動色原隰生光竊以



乾德肇基總漕權而置使熙宣繼統選屬籍以臨民  
故侯邦無貢賦之專而宗室有才猷之顯方九重總  
攬循累聖之規摹宜十道按澄得近親之標的恭惟  
運使少監受才傑異造理精微極翰墨之工粹焉  
得作者之體屏膏粱之習肅然有寒士之風蚤踐要  
途寢膺妙簡天生五材而兵莫去既顯器械之修農  
用八政而食為先復領轉輸之任寵檢仁聽于嚴召  
駕行更覩於榮登某初忝微名尚需久次實隸澄清

之末方承潤澤之新意嚮彌勤詞訥難盡

賀曾都運啟

葛謙白

顯奉溫論出將明命臨軒錫節極膺使之光榮入境  
宣猷聳斯民之觀聽外臺增重薄海謂宜恭惟某  
官天為時生材非輩及閱一時賢愚忠佞之士湛水  
鑑於胷中陳千古興衰治亂之原驅風霆於筆下夙  
奉經綸之略久蒙神聖之知既蚤冠於時髦宜發揚  
於賢業輟郎省光華之直膺使輅臨遣之榮乃睠西

江素為奧壤粟盈塗廩資轉餉以毋飢牒滿銛筭非  
神明而孰斷暫借調羹之手丕陶珥筆之風吏背霜  
寒民心春豫淑氣已騰於闔境治聲行達於中宸孟  
博登車咸識澄清之志仲山補袞當收輔弼之功詔  
紫行頒汗青可待某技能謏薄命數竒窮駕短轅於  
羊腸泣岐何補垂獨壘於冰井羨魚奚求棲遲簿領  
之間荏苒歲時之久昔年游宦嘗瞻圭壁之粹姿末  
路漂流獲託雲天之厚庇茲為幸會寔夤緣誓展究

於一心庶仰承於六察牛羊茁而會計當敢忘守職  
之勤川澤納而山藪藏或免空官之責

賀邵都運啟

葉少蘊

伏審光膺宸制榮總漕權李邵占星萬里快披雲之  
覩范滂攬轡百城爭擁簪之迎凡屬悒悒舉深鼓舞  
恭惟都運中大天球毓質國棟呈材腹笥道家之  
蓬瀛量陂楚澤之雲夢鳳姿英偉宜摛李揆之文章  
犀腦瑰竒足驗馬周之富貴妙齡警悟逸韻掀騰亨

路自期錐處囊而立見盤根厯試办發矧而益新公  
忠上結於主知眷遇特隆於朝列踐更華要藹著聲  
猷持節外臺擅激濁揚清之譽剖符巨鎮有承流宣  
化之能屢捧褒書趣還入覲金鑾揚對瞻咫尺之天  
顏玉陛拜恩奉丁宣之聖詔暫辭魏闕出按全閩除  
目初頒遠民胥抃運關中之粟漢方委於蕭何流地  
上之錢唐正資於劉晏伫觀奏課即見追鋒某鈇槩  
寒儒塵埃冗吏負丞無狀曾微一日之長佐邑奚功

幸託二天之庇側聆新命深激懦衷負弩矢以前驅  
簡書匏繫瞻旌麾而尚遠燕雀心傾欣躍之懷敷陳  
罔既

賀姚都運啟

熊叔雅

伏審宸簡載揚暫輟一麾之守使輶榮領揔持十國  
之連仰旌旆以戒塗罄郊圻而被澤恭惟 都運中  
大學優聖域識造經郭風采冠乎朝中文章妙乎天  
下薦更藩服之任深結冕旒之知亟奉璽書特司邦

計朱幡皂蓋恩波方浹於壺山金節繡衣歡頌已騰  
於桂嶺指顧而足以肅清官吏笑談而足以鎮撫士  
民既權貨殖之低昂行見倉箱之儲積登車攬轡方  
威振於外臺當軸秉鈞仁詔歸於中禁某倥侗陋質  
翫髻餘生業徒紹於箕裘恩濫承於簪紱恪奉官聯  
之守謬居縣佐之司即獲趨承幸依光於韓斗每虞  
曠敗庸託茫於蘇天

賀吳都運啟

孫逢辰

光膺明命榮領計權攬轡登車聳百寮之觀聽飛芻  
輓粟總六路之將輸夙望愈高邇遐交頌伏惟某  
官才猷超遠智識淵深夙懷經濟之心適際亨嘉之  
會踐揚中外更累事功惟東南財賦之資實邦國經  
常之計蔚為時傑擢自宸衷知眷注之益隆暢光華  
而甚遠幹旋萬貨指掌之上敷陳千里如對面之間  
刺舉之權幾半天下轉輸之利益富京師想聞坐席  
之未溫已見鋒車之趣召某獲依鄰比忻聽除書一

水相望莫遂門闌之慶寸誠可達輒伸竿牘之私

賀吳都運啟

陳師禹

細札十行光被發中之詔軺車一乘暫淹補外之行  
非特門下諸生之光實為江濱千里之福恭惟某  
官學臻壺奧才邁等倫更事彌多歷朝寢久盤根別  
利器之用庶民知勁草之堅帝在右之十年屢膺任  
使江東西之二路復藉按廉十旄自浚都而來四牡  
由周道而至暫虛八座重庇一方父親歡呼爭都皇

華之使者君王記念將用權輿之舊臣某閣卷寒生  
門墻故吏平原狂士曾叨薦鶚之書武城小邦謬展  
割雞之小限拘縣道阻造賓閔

賀陳都運啟

王弱翁

伏審疏寵禁闈宣風遠服聽除書之一札藹和氣於  
列城凡屬按臨舉深抃蹈恭惟都運朝議氣涵剛  
大德茂老成學以孔孟為師道傳堯舜之統一門忠  
孝彌赫家聲萬卷詩書久隆士譽擬殊科而自奮據

要路以橫飛頃貳藩條卓爾循良之助逮紆郡紱凜  
然風烈之高眷全閩郡縣於東南繫今日國家之根  
本薦煩澄按益茂深猷操開闔歛散之權制之在我  
明因草弛張之術利必排商自非練達之才曷稱將  
明之任擇使如此非賢謂何富國裕民聊藉轉輸之  
計鳴珂佩玉伸歸禁近之聯某錦里下僚龜城落譜  
頃有十年之慕已輕萬戶之封豈期么麼之蹤將託  
帡幪之庇倭遲川陸愧鳧飛鳥之鳧夢想門闌徒深

賀厦之驚舜絃協奏義馭正長願寢餗之精調宜吉  
祥之多舍興言祝頌實倍等倫

賀祝都運啟

張安國

擁傳坤維榮拜絲綸之寵移轅楚甸遙瞻禮樂之華  
辱貽問之相先愧修辭之不敏恭惟 某官性天洞  
達德宇閎深賢推當代之英學探古人之粹糾合宗  
族蓋嘗作召穆公之詩竊伏海瀕孰不慕暴勝之之  
義富邦中之積穀餘地上之流錢益結上心之眷知

亟以使指而還報六轡如組載占蜀道之星一節以  
趨遂近長安之日第暫勞於賦政仁邁促於告猷某  
契濶許時親依即日靈河千里切遲望於前驅江海  
一麾實希承於餘潤

賀胡都運啟

黃季岑

伏審光奉恩綸載持使節眷倚復還於舊物聲猷增  
煥於公朝遂令浩穰之區重出按臨之下命傳畿甸  
榮動搢紳恭惟 都運敷文厚德鎮浮宏材經遠承

流宣化魁治行於龔黃足國裕民踵勲勞於管晏方  
自淝河之劇部就更淮水之雄藩旋聞報政之優亟  
被賜環之渥蓋將主四方之大計何止分一路之要  
權再過吳邦依舊皇華之光耀重趨魏闕一新使者  
之威儀趣還文石之清班即荷甘泉之從橐佗拜趨  
遷之寵茲為進用之階某久託幘幪復叨庇賴念此  
及瓜之迹寧無啗蔗之心燕雀卑飛竊欣同於賀厦  
鸞鳳遠舉行快覩於沖霄慶抃徒深敷陳罔既

賀梁都運啟

周少蘊

十行賜書拜北闕使藩之寵一封輶傳總南州飛輓  
之權有識交欣不謀而利恭惟 某官受才敷敏稟  
識疎明割十九牛而發办若新九萬里而搏風在下  
形瞻問俗用蠻徼之山川繡節觀風脩皇華之禮樂  
仁最輸將之最進聯清切之班某仰佩勞謙曲垂雅  
好莫陪賀客第私尺牘之藏更聽還朝日僉高旌之  
過

賀張都運啟

王履道

伏審顯被上恩總司大計按節甫臨於近部飄風仁  
抵於行臺方托庇庥竊增驩仰恭惟 某官飛聲帝  
闈擢秀士林惟一純誠有三峻德更踐外中之寄通  
詳細大之為明朝日講於事功諸道歲登於財賦博  
謀強敏思致羨盈轉金穀於東南仁凝美績陟疑丞  
於左右茲寔便階某叨佐下藩邈拘瀕海未由慶牘  
第積瞻依



賀呂都運啟

景廷玉

茲審肅膺帝制榮總漕權藉飛芻輓粟之大資富國  
強邊之算伏惟某官謀猷方古才術經時變通自  
得於幾微幹幹靡勞於指顧效進被寵章某  
愧尺牘之未修積愼顏之方甚何期厚德首貺華牋  
其在銘藏豈勝云喻

賀汪都運啟

程子山

伏審顯膺命綽峻領計臺使星與台耀交光繡節共

綵衣爭煥摺紳歡慕父老聳觀恭惟某官博雅而  
練詳靖深而通敏公圭宰路果知世美之才文館仙  
瀛允屬庭趨之學特茲簡眷付以轉輸况嶺佐之列  
城號海南之劇郡千艘湊集轉粟於關中萬賈阜通  
流錢於地上竝觀吳最別聽殊褒某切歎衰遲獲依  
威望富民乃能富國當拱俟於規摹足食然後足兵  
願欽承於訓誨

賀余都運啟

黃季岑

最課藩條陞華使節餘波未遠宜草木以知名溫詔  
具頒舉江湖而自得外臺增重下邑均驩恭惟 某  
官受才高明履行中正聖門深造發為金玉之文國  
器自將挺有鼎彝之烈蚤壇公車之對爰躋上第之  
榮天下謂登瀛洲盡閱圖書之秘郎官上應列宿首  
推衡鑑之公當羣枉之厚誣蓋十年而三黜盜雖憎  
主天亦勝人鷓鴣先鳴坐恐衆芳之歇碩果不食終  
違君子之言乃眷名城亟還舊物雖罷俗甫安於勞

來而公朝未厭於簡求駟馬遙驅遠借皇華之寵二  
星相燭近聯棠棣之棠少收轉漕之功即慶論思之  
拜某濫由蚤歲獲齒諸生不圖流落之餘復有帡幪  
之幸門人應對洒埽庶有取於初心俗吏期會簿書  
竊自憐於末路

賀任提刑啟

張安國

伏審近仙闈錦帳之擅昔聯輝於列宿瞻使者繡衣  
之斧今託芘於天二將祇奉於教條敢敬馳於書牘

恭惟 某官學潛精粹德秉純全素節清規表儀於  
鄉黨閎猷深議潤色於朝廷容臺正絕禮之訛憲府  
極繩愆之効方仁荷橐之拜俄交蕩之行千里上游  
暫著平反之譽九闕帝所即期趨召之歸某一去賓  
閎屢更歲籥躬耕下澤徒瞻睇於光躔假守偏州乃  
密依於蔭樾所冀少寬於程督庶將自力於拊攀

賀周提刑啟

呂濟叔

榮膺溫詔肅按祥刑傾朝共羨於寵光列郡聳聞其

風采先聲甫播歡頌交騰恭惟 某官智識達先器  
度凝遠胷襟今古功名皆所自期骨氣公侯富貴知  
其未艾蚤通禁籍旋據要津郎官上應於天躔卿月  
輝連於尹日雖中宸政延於耆舊然南州願借其威  
名皇華有光方下載馳載驅之問甘棠聽訟將興勿  
剪勿伐之思一軺詎許其久留二節亟聞於走召某  
當持版辱在望塵且蹤跡自有升沉久隔同年之面  
儻道義不分窮達迺知今日之情

賀陳提刑啟

耿元鼎

伏審丹筆讞刑寵持星節皇華改旆近在日畿斷由  
當之之知喜動在廷之色光生治郡威竦屬城恭惟  
提刑司諫敷文高明而道中沉潛而剛克協契藻  
皃之會踐揚蒲豸之班所願則學仲尼敬王莫如孟  
子東山志在旋聞勇退急流南國化行皆謂立登於  
要路屬經邦賦謀畀漕權欲錢穀之間不至於廟堂  
才豈嫌於因任使饋餉之行弗絕於道路禮難緩於

召恩夫何大江之東暨乃淞河之右相望兩地平反  
皆要於得賢所謂一天臨遣莫如於圖舊載念長安  
之遠近有繫雪山之重輕恐懷夜半之思輒慰日邊  
之見知弱翁藏器豈簿書獄訟云乎謂虞舜好生亡  
歎息愁恨可也力除民瘼想慰上心鞠茂草於園扉  
豈特受八州之陽報面高槐於公位會當為四海之  
陰涼其早覲光躔親承蔭宇不疑樞具誰阻先賀屨  
之趨商浩書函願敢後典籤之貢其如欣抃罔旣敷

陳

賀丁提刑啟

陸子履

西掖出綸望宸旒而拜貺南州總憲揚使節以生光  
屬在按廉舉同抃躍恭以 某官氣渾且粹名重而  
高得道先知削陳言於糠粃指迷後進炳至理於丹  
青鯨翻學之中虎視詞林之上會聖神之繼照慶賢  
哲之隆辰步驟都司翱翔禁苑未覆金甌之姓忽離  
玉笋之班采輶方下於九霄傳檄已清於萬里願惟

治世久入化鈞羊皆懼於觸藩魚或容於漏網成康  
復古屢聞囹圄之空堯舜同風或用衣冠之畫敢期  
淑問尚屈皇華雖甚鬱於朝僉然已深於帝簡仁承  
優寵別踐榮途某蓬華地寒菘蘆質弱雖沐殘膏之  
霑丐未親大匠之詆訶采藻為羞幸預魯邦之樂折  
梅傳信阻參庾嶠之登餘冀保調少符頌望

賀王提刑啟

林豈塵

伏審恩疏天闕榮總星臺老成人惟舊之求士大夫

不勝其喜言非私佞賀與衆同竊謂朝廷以外任而  
匪輕監司於它官而尤重雖本夫省覽風俗而後命  
又專以提點刑獄而為名若聽斷則存至公之心而  
欽恤不過有司之事至於郡邑之政必考其優劣與  
夫小大之吏當察其賢庸孰為是孰為非某可賞某  
可罰無為姑息徒欲希寬厚之名當示威嚴然後稱  
刺舉之職惟東廣總十四州之版籍於南蠻通數萬  
里之梯航金貝綺爛之鮮華珠香象犀之磊落小人

藉此以行路汗吏見之而循財度嶺以來仕皆有五  
瘴之患引泉而飲貪遂成千金之懷居幕邑者每專  
其權司庫務者咸濟所欲其間鬻獄撓法而罪猶貸  
免亦有倚勢作威而政以賄求自謂耳目可掩而無  
所見聞各以肺腑相托而為之黨與或剥下以奉上  
悉虧官而實私羣胥相煽以為奸百姓有冤而無訴  
倘至是邦而必聞其政若聞此事則可知其人苟非  
繩三尺之文烏能絕一方之蠹誰可任者公其當之

恭惟 提刑敷文司業侍講先生道高明而尊所聞  
氣剛大而養以直垂令名乎日月之下得此聲於霄  
壤間凡一時事業之設施迺平昔詩書之張本環林  
圓海坐觀間席之儀廣廈細旃樂聽巍冠之講香寢  
重煩於卧護琳宮旋即於清間張留侯未許赤松之  
遊謝太傅當為蒼生而起雖東府久虛於輔贊然南  
方九望其光華攬轡而已示澄清褰帷而欲開視聽  
正當豺狼可畏之路亦在鷹隼方擊之秋昨日私今

日公勿謂有蘇章二天之庇頑夫廉懦夫立若皆聞  
伯夷百世之風載歌六轡既均之詩恐有二節以走  
之某自惟小子辱在門人自當聞洒埽應對之言今  
獲備奔走指呼之役寸長尺短將受品藻特達之知  
十幅八行恥作尋常好佞之語矧官况自安於冷落  
奈俗情猶笑其欽歎愧獨無李翱書記之才恨未遇  
侯文督郵之命詎肯學豈有漏網之對當首獻無令  
敗羣之辭負弩矢之驅且將陪縣令之後操几杖以

往遂行從長者之謀欣忭良深敷陳罔既

賀呂提刑啟

伏審璽詔疏榮繡衣將命周爰咨度駟騏之我馬載  
馳遠有光華原濕之皇華不易洗印已聞於三日褰  
帷先動於百城郵音一傳輿頌四起我國家以外臺  
所任為重部刺史於它官尤難沿漢朝之制以六百  
石而掌奉詔條稽唐室之令於十五道而分為採訪  
其在刑獄則有提點登發運之號知按州縣而為巡

駘黜陟之名雀鼠無爭必能若召伯聽行露之訟狐  
狸何畏可無愧張網埋都亭之輪至於觀風俗而究  
媿惡之繇與夫察官吏則有賢庸之別訊謠誦之美  
刺以審哀樂簿書之煩省以審決滯視墾田之盈縮  
以稽本末賦役之薄厚以稽汙廉孰為是孰為非某  
可罰某可賞既刺舉不私於勢利故觀瞻咸竦於風  
聲非徒重循行之權亦無負澄清之志惟帝時舉則  
公其人恭惟 某官通高明而尊所聞氣剛大而養



以直振鴛鸞之翼而騫翔禁路垂虹蜺之光以熠燿  
清朝久騰郎宿之輝屢應使星之瑞草木無識江淮  
皆知其威名芻粟有餘閩粵暫勞於飛輓俄演綸而  
錫寵復持斧以宣風九重之雨露惟新八郡之江山  
如故冠蓋旁午姑煩六轡此行衣鉢登庸將見一門  
盛事某一官甚下十室至窮未免塵埃奔走之勞爰  
備弩矢先驅之役寸長尺短將受品藻特達之知十  
幅八行恥為尋常好佞之語

賀張提刑啟

曹發之

伏審顯膺明命分總祥刑弭節未前粲星華之可想  
登車甫邇溢輿頌之已興載仰高風敢稽慶牘恭惟  
某官直清宏偉博大疎通三賦流傳已鏗鏘於金  
石六經浩博仍洞究於淵源惟才大故兼數器而有  
餘惟道尊故謫九年而不屈高文大策謂非公其誰  
宜為正色謹言雖於我不容何病永惟正直之是與  
終必功名之可期激濁揚清聊惠綏於關陝獻可替

否即左右於機衡某逮壯而孤既貧且賤牛角之歌  
已久龍門之願不違假餘照以千榮雖非所學就大  
方而發藥終冀有成

賀李提刑啟

鄭毅夫

薦被寵章榮將使指已臨封略再見士民致全蜀之  
生光望三俄而增氣伏惟 某官宅心忠厚稟性高  
明克著猷為茂膺簡在昨聞弭節未即造朝雅志高  
情少愒江山之上渙恩異數再頌綸綍之中方時多

艱惟賢可進某立朝無狀生世不諧久抱沉疴自干  
薄謫仰賴併蒙之大庇冀安朝夕之危蹤舉類進賢  
粗有心于前日承顏接教遂適願於此時矧季弟懷  
嘗識之私而嚴君結交承之好託契之厚舉世所希  
專使聿臨華緘下逮情文俱盡慰藉不踈自惟放逐  
之餘曷勝始終之眷其如感慰罔盡名言

賀葉武提刑啟

熊子復

伏審肅奉制函榮分憲節屬鞬而侍天宸儀已亞於

從塗把繡而蒞星臺任獨隆於使指搢紳聳動原隰  
增光恭惟 提刑御帶秉質粹和飭躬純正文辭特  
妙有老成之波瀾政術素優皆儒雅之緣飾早膺宸  
獎久扈禁遊屬參景德按刑之章併除兩使庸輟咸  
平帶御之職共察一方暫出惠於嘉師仁歸承於密  
命某比嘗引疾本以丐閑猥誤明恩顧移劇任一麾  
重至自經遲邁之身六轡方來當奉承清之化

賀鄧提刑啟

王致君

伏審光膺帝制榮總憲綱朝廷允賴於忠良郡邑聳  
聞風其采除音誕布公議咸歸竊以有德為形宜得  
盡心之君子非妄折獄當戒少恩之法家如得其情  
則曾子務於哀矜閱實其罪則呂侯貴乎審克既詳  
八辟以為之議又求三刺以斷其中寧失不經惟臯  
陶然後稱士師之任例用中罰非蘇公不足充司寇  
之官美加謹於于張善從寬於陳郭凡作天牧莫非  
哲人雖號為茂業藹然照耀方冊曾未有徽猷藉甚

超踰古今屬二聖有為之盛時席千載無疆之休運  
明德謹罰發政施仁同夏禹之位辜効成湯之罪已  
謂律令蓋非所以先也在帝王不得已而用之雖禁  
暴止邪固當嚴於法守而司政典獄亦嘗患於才難  
有能持近厚之心方可布好生之德疇若予采日惟  
公諧恭以 某官天與多能身兼數器凜凜古人之  
烈恢恢王佐之才明於見善而剛於用心究於執德  
而篤於信道致用則森森之武庫濟時則浩浩之樓

航事有作以皆成才無施而不可昔參大計何止有  
九年之儲今按謹刑將使亡一人之獄輶車鳳駕屬  
部初臨聲光熠燿而清風襲人旌節駢闐而和氣滿  
野方此觀風之始翕然布治之和不假埋輪當路已  
為之震恐無煩攬轡遠方威得以澄清轉呻吟而作  
謳歌化姦宄而為淳朴上禩聖世幾拱而不用之成  
康下使嘉師知欽哉惟恤之堯舜蓋將大任以貽蒼  
生之福故先煩使以觀智者之能道大不可以小知

器遠宜元以近用三千國典暫資明允之才九萬天  
衢伫展翱翔之翼坐未容於暖席召行聽於追鋒伏  
念某黃卷腐儒青衫委吏早自提孩提子之日稔服  
搢紳先生之名雖丘垤仰泰山固無階而拜德然駕  
駘希逸驥常有志於望塵偶幸會之自天繫庥庇而  
得得地備員曹掾隸職部封使節煌煌夙喜執鞭之  
慕公庭殖殖伫諧飲板之趨踵元禮之門闌有同登  
坂識朝宗之標矩不願封侯削劔方彈鉛刀乍試一

嘖一笑莫聞咳唾之吹噓三沐三薰庶使精神之澡  
雪擣櫟欣逢於匠石礦頑待鑄於洪爐仰止南溟莫  
識鯤鵬之志依於大廈不勝燕雀之情

賀程提刑啟

黃夷甫

伏審中膺明命出總祥刑凡在庇庥舉深抃幸恭惟  
某官性質敏達襟韻粹和以適時之周才旁通於  
事物以盡性之道學兼總於憲章明辨絕倫直清不  
撓雋不疑之經濟名重公卿于定國之仁心澤施孫

子暫紆九列來惠一方行當踐歷於世官何止顯揚  
於淑問某方塵州序最近使華念久企於光塵乃今  
諧於教載其為驩頌更倍等夷

聖聖宋名賢播芳大全文粹卷六十終

